

Newspaper	Utusan Malaysia
Date	9/1/2013

## Kenyataan media penggunaan kalimah Allah oleh agama selain Islam

UM-9/1/2013

SULTAN Selangor telah melahirkan rasa terkejut dan kesal dengan kenyataan Setiausaha Agung DAP, Lim Guan Eng yang dipetik daripada media massa yang meminta agar kerajaan Malaysia membenarkan kalimah Allah digunakan dalam semua Bible berbahasa Melayu.

Berikutan dengan kenyataan dan gesaan tersebut, Sultan Selangor telah memanggil satu mesyuarat khas dengan beberapa Ahli Majlis Agama Islam Selangor (MAIS), mufti dan pegawai tinggi MAIS dan Jabatan Agama Islam Selangor (JAIS) pada 6 Januari 2013.

Sultan Selangor telah membuat ketetapan dan menitahkan dengan tegas bahawa kalimah Allah yang merupakan kalimah suci khusus bagi orang Islam tidak boleh sama sekali digunakan di Negeri Selangor oleh mana-mana agama bukan Islam sebagaimana yang telah difatwa dan diwartakan pada 18 Februari 2010, (Sel. P.U. 6).

Malah baginda pernah mengeluarkan titah yang sama berkaitan penggunaan kalimah Allah tiga tahun yang lalu apabila isu ini pertama kali dibangkitkan.

Namun Tuanku amat kesal kerana titah baginda telah dipandang ringan oleh sesetengah pihak sehingga isu yang sama dibangkitkan semula.

Berikutan dengan itu, Tuanku juga telah menitahkan MAIS dan JAIS untuk mengambil tindakan tegas terhadap mana-mana pihak sama ada orang bukan Islam atau dalam kalangan orang Islam sekalipun yang masih mempersoalkan atau memperlekehkan fatwa yang telah dikeluarkan mengikut peraturan undang-undang yang sedia ada

di negeri Selangor.

Di negeri Selangor terdapat undang-undang yang telah digubal oleh Dewan Undangan Negeri (DUN) pada 1988 dan dikuatkuasakan pada Julai 1988 berkaitan pengawalan penggunaan kalimah Allah iaitu Enakmen Ugama Bukan Islam (Kawalan Pengembangan Di Kalangan Orang Islam) 1988.

Enakmen ini telah diwujudkan selaras dengan Perkara 11(4) Perlembagaan Persekutuan. Seksyen 9, Enakmen berkenaan telah dengan jelas melarang kalimah Allah daripada digunakan oleh orang bukan Islam di dalam apa-apa perkara yang berkaitan dengan agama mereka.

Tuduhan dan hukuman boleh dijatuhkan bagi mereka yang melanggar peraturan ini.

Baginda juga menitahkan agar orang bukan Islam supaya tidak mencampuri urusan agama Islam bagi mengelakkan permusuhan dan salah faham dalam kalangan kaum di negara ini.

Selanjutnya Tuanku menitahkan bahawa mana-mana pihak adalah ditegah dan dilarang sama sekali daripada menggunakan atau memperalatkan agama Islam sebagai modal politik mereka kerana ia akan mengakibatkan kemusnahan kepada keamanan yang dikecapi oleh rakyat pelbagai agama di negara ini.

Sebarang penjelasan lanjut dengan fatwa dan undang-undang berkaitan kalimah Allah di negeri Selangor, bolehlah melayari laman web MAIS di [www.mais.gov.my](http://www.mais.gov.my).

**DATO' HAJI MOHD. MISRI BIN HAJI IDRIS**  
Setiausaha MAIS